
КОРОНАВИРУС ЯНА ТАҲДИД ҚИЛМОҚДА

Бугун Президент Шавкат Мирзиёев раҳбарлигида коронавирус пандемияси даврида мамлакатимизда амалга оширилаётган ижтимоий-иқтисодий ислохотлар ва бу борадаги муҳим вазифалар ижросига бағишланган видеоселектор йиғилиши бўлиб ўтди.

Йиғилишда тадбиркорлик фаолиятини қўллаб-қувватлаш орқали янги иш ўринлари яратиш, аҳолининг муқим даромад манбаларига эга бўлишини таъминлаш муҳим аҳамиятга эга эканлиги таъкидланди. Шу билан бирга юртимизда коронавирус инфекцияси тарқалишининг иккинчи тўлқини бўлмаслиги учун бир дақиқа ҳам ҳушёрликни йўқотмаслик, ҳар биримиз карантин қоидаларига риоя қилиш бўйича шахсий масъулият ва интизомни унутмаслигимиз зарурлигига алоҳида эътибор қаратилди.

Видеоселектор йиғилишидан сўнг вилоят ҳокими Шухрат Ғаниев бошчилигида вилоят карантин штаби раҳбари, вилоят санитария-эпидемиологик осойишталик маркази, фавқулодда вазиятлар ва соғлиқни сақлаш бошқармалари бошлиқлари иштирокида тезкор йиғилиш ўтказилди.

- Энг муҳими, ўзини ўзи яккалаш, вилоятимиз “яшил” ҳудудда бўлганлиги сабабли карантин тартиблари енгиллаштирилишига беписанд муносабатда бўлмаслик керак, - деди вилоят раҳбари. - Афсуски, енгиллик берилган илк кунлардаёқ вилоятимиз аҳолиси ўртасида карантин қоидаларига амалга қилмаслик билан боғлиқ ҳолатлар кўп учрамоқда. Ноқонуний равишда умумий овқатланиш шохобчалари фаолиятини йўлга қўйган тадбиркорлар, такси ҳайдовчилари, буюм бозорлари сотувчилари, ёш болаларни ниқобсиз сайрга олиб чиқаётган ота-оналар коронавирус таҳдиди туфайли карантин тартиблари яна кучайтирилишига сабабчи бўлиб қолишлари мумкин. Шу сабабли энг биринчи масала - ниқоб тақиш, ҳамма ушбу вирусдан ўзини асраши зарурлигини унутмаслик лозим.

Таъкидлаш жоизки, пандемия даврида тадбиркорлик субъектларига берилган имтиёзлар натижасида вилоятда 1 триллион 270 миллиард сўм миқдоридаги кредит муддатлари узайтирилди. Тадбиркорларга ўз фаолиятини бир маромда давом эттириши учун 379 миллиард сўмлик субсидиялар ажратилди. Вилоятда 10 минг 600 нафар тадбиркорлар белгиланган солиқларни тўлаш муддатини жорий йилнинг 1 октябрга қадар узайтириш бўйича тақдим этилган имтиёзлардан фойдаланади.

Йиғилишда вилоят карантин штаби, тегишли мутасадди идоралар раҳбарлари фаолияти таҳлил ва танқид руҳида ўрганилиб, коронавирус пандемиясига қарши ўзаро ҳамкорликда олиб борилиши зарур бўлган муҳим вазифалар белгилаб олинди.

Фарғона вилояти ҳокимлиги Ахборот хизмати Facebook, Telegram, Веб сайт, YouTube

2020-06-16 22:35:45